



TAPAK 9

CBI-i Prannoy Roy'er kiojentem mita aoba aitsür



TAPAK 7

Tiger Shroff-i Munna Michael nung ni tsüngsangtsü yari: Nawazuddin Siddiqui

VOL. XIV NO. 229 (ADOK 229)

DIMAPUR

WEDNESDAY

JUNE 07, 2017

5.00

Nagaland sorkari NSCPCR züngsem shim

Dimapur, June 6 (TYO): Nagaland sorkari Nagaland State Commission for Protection of Child Rights (NSCPCR) nung züngsem asütsü atema Kuda Village, Dimapur nung alir Zhalievino Peseyie shimogo, ta Social Welfare Department-i sangdong ka nung metetdaksü. Lai iba mapa agizükba anogo nungi tenzüker Commission-i iba Act kübok tashi amshitsü aser mapa inyaksü, ta sangdong nung shia lir. Social Welfare Department sangdong nungsa ashiba agi, NSCPCR indang Headquarter ji Kohima asütsü aser Chairperson o Member temji mapa inyakba anogo nungi tenzüka küm 3 kümsük atema inyaksü.

School Education-i 'financial assistance' indang metetdaksür

Dimapur, June 6 (TYO): 2014-15 academic year atema "Support for Professional Education of Children of School Teachers" scheme kübok application forms agütsür, ta School Education Principal Director, Smita Sarangi, IAS-i sangdong ka nung metetdaksü. Iba teyari aginüba tesayurtemi June 7-17, 2017 tashi Directorate of School Education, Kohima nungi form agizüksü akok aser June 19-30, 2017 tashi nung office nung agütsütsü metetdaksür, ta School Education Principal Director-isa metetdaksü. Tatembang anogo süir aruba application form magizüksü, ta laisa shisem.

CNTC-i Ao Senden & Sumi Hoho ketdangpurtem pela agizüker

Dimapur, June 6 (TYO): Ao Senden aser Sumi Hoho nung mendenpur tasentem nem tenüngsang agütsür, ta Central Nagaland Tribes Council (CNTC)-i sangdong ka nung metetdaksü. Kin asem atema tongti sabang ka ama CNTC-i kin asem atema dang masü saka Nagaland nung alirtem den maneni telongjem, teyaritip aser tenanzüktep kübok inyaka aotsü. Tai inyakyim aser tangatetbatem anema CNTC-i maneni inyaksü aser tarutsü jenjang tajungba kümdaksütsü atema Nagaland nung alirtem taginüba aser alizüngtem atema inyaksü, ta Media Cell sangdong ka nung ashi.

Modi'er sorkari Northeast melenshitsuögo

Imphal, June 6 (Agencies): Imphal nung Narendra Modi'er sorkari kum asem takok ngua Northeast nung temelenshi bener aruogo, ta Mongulbarnü Union minister Jitendra Singh-i ashi. Küm aika Northeast senzüka toktsüba, Modi'er sorkari kum asem tsüngda terenlok bener arutsüögo, ta paisa ashi. (Maneni tapak 11 nung...)

Centre-i sensakertem atema tenzüksüba scheme tem tangutsüpur matonger



June 6, 2017 nü Kohima nung Great Membership Drive tenzüksüba sentong nung BJP President Visasolie Lhoungu aser Kohima District Unit president Dr. Khriezovolie Kesiyie na den BJP Kohima Unit ketdangpurtem külemi agiba noksa angur.

Kohima, June 6 (TYO): Centre nung BJP sorkari sensakertem atema scheme aika tenzüksüögo saka itemji state nung teküpoktiba jenjang nung alirtem matonger, ta BJP Nagaland-i tanü ashi.

Tanü Kohima nung BJP Kohima Unit office nung Great Membership Drive sentong tenzükdang BJP Nagaland tir, Visasolie Lhoungu-i iba osang metetdaksü.

"BJP-i sorkar akümtsü atema kanga meranger aser 2018 elections nung onok nem

sorkar akümtsü maongka agütsüra, sensakertem atema tenzüksüba scheme ajak indangindanga atongtsü atema mapa inyaksü. State ajungalen onoki terenlok kasa agütsütsü atema inyaksü" ta Visasolie-isa ashi.

"BJP-i tongti süa bilembaji nübortem nungdak, teimla, taginüba aser imlabatem lir" ta paisa shisem.

Prime Minister Modi indang mangdang aser teinyaksü sentongji sorkari sensakertem, lanurtem, yimdaklirtem aser

aluyimertem aser loktiliba nung tangar memenepertem ajungkettsü atema lir, ta BJP Nagaland tirisa metetdaksü.

BJP ya yimtenren telok tulutiba lir aser onok indang mangdangji tanga yimtenren teloktem dang nungi balaka lir.

Tanga teloktemi gari lenmang, electricity, education, water supply amala onüktem jembir saka onoki item dak alia teküpoktiba jenjang nung alirtem ajungkettsü atema temulung agütsür, ta paisa ashi.

(Maneni tapak 11 nung...)

Oct 12 nü Sonia Gandhi-i tir menden toktsütsü akok

New Delhi, June 6 (Agencies): Taküm October 15 nü Congress indang internal elections agidang Sonia Gandhi-i Rahul Gandhi nem lenmang lapokja tir menden toktsütsü akok.

Mongulbarnü Congress Working Committee (CWC)-i internal elections agitsü sentong mulunga agizük aser ibaji October 15 tashi nung tembangtsü.

Tanü CWC senden nung o jembidang, Sonia-i party züngsemtem dang telok tashi itdaksütsü aser temulung agüja tekaratiba nung organisational elections agitsü atema ayongzük.

"Asenoki asen telok tashi itshidaksütsüla. Tang tagidak organisational elections ya tekaratiba nung aser nendaka agitsüla" ta laisa ashi.

Senden nung Rahul Gandhi tir menden nung ajungkettsü atema jembia asü mejembia ta o s a n g b e n e r t e m i asüngdangdang, Congress lennir tejen GhulamNabiAzad-i mejembia ta langzü.

"CWC-i organisational elections agitsü mapang mulunga agizükogoo" ta Azad-isa ashi.

Yaküm November ita CWC züngsemtemi Rahul tir menden nung ajungketnür ta tebilemba metetdakja liasü.

November 7 senden nung

taoba prime minister Manmohan Singh aser lennir tejen A K Antony nati anir züngsemtemi Rahul nem Congress tir inyakdaksüba tebilemba lemsatep.

Tang teinyakdak Congress tir Sonia-i küm 130 tain yimtenren telok nung otsü tasen ka yangluogo aser ibaji küm 20 jungnüa tir mapa inyakba indang lir. 1998 küm CWC-i Sitaram Kesri tir menden nungi agienba sülen Sonia-i iba menden melenzüka liasü.

January 2013 nung Congress senden ka Jaipur nung alidang Rahul Gandhi tatong tir inyaksü shim.

Qatar den tesentaktep pilaba ajanga kiralongraba tembangtsü: Donald Trump

Washington, June 6 (Agencies): Qatar den tesentaktep pilabaji kiralongraba tembangtsü atema tetenzüker lir, ta US tir Donald Trump-i Mongulbarnü metetdaksü.

Hombarnü Saudi Arabia aser Egypt dena Arab linüktemi Qatar den tesentaktep malitsü telemtetba agi. Qatar-i talila

bilemloka oa amangba Islam züngsemtem pusema yarir ta tai tonglokja parnoki iba telemtetba agi.

Qatar-i Gulf tesem nung mepetmesü adokdaksütsü aser teraksa bener arutsü atema inyakba teloktem pusemer aser Qatar dak alia Iran-ia item telok kar pusema yarir, ta yashi Saudi

Arabia, Egypt, Yemen, Bahrain, Libya, UAE aser Maldives linüktemi Qatar den tesentaktep malitsü lemtet.

Ajisüaka, Qatar-i parnok dak tai tongloktsüba onükji magizüker ta metetdaksü. Gulf nung kidanger linüktemi par linük madak kibur kümmür ta parnoki meyiper aitsüögo.

**TANGATETER
OCHISHIR
JAKLA TAJUNG AKETBA
ASER
NÜBORTEM
DANG
KANGA MEIMBA
NISUNG NEM
VOTE AGÜJANG**



Kohima Symphony Academy of Music kongsang tasembuba lapok



June 6, 2017 nü Tinpatti Kohima nung Naga nung musician 6-i Symphony Academy of Music Kohima lapoktsüdang agiba noksa angur.

Kohima, June 6 (TYO): Kohima nung 'Symphony Academy of Music' indang kongsang tasembuba Tinpatti tesem nung lapokogo. Iba kongsang ya PowerComm sannüker Messen-i meshiteta sarasademtsü aser Naga nung musician 6- Yanpvuo Kikon, Sanen Kichu, Sunep Oz, Mhaseve Tetseo, Zubeni Kikon o Virie nungertemi lapok. 'Symphony Academy of Music' kiburji Mele Pucho lir aser pai osangbener den

sensaksem dang ashiba agi, pa 2010 küm kidangi meyipa aruba sülen sempet aketba musician aika angu saka parnok sempet ajungkettsü atema sabang maliba anguba agi Kohima nung music school ka lapoktsü mulungtet. Kentenba aser kongki atemba ya Tsüngrem nungi sempet tajung ka lir aser iba sempet ya Pa sentsüwangshi atema amshitsüla, ta Pucho-isa ashi. Nagaland nung music education ajungkettsü aser

music meimertem nem tesayuba agütsütsü atema pai mezüng school ji lapok, ta paisa shisem. Symphony Academy of Music nung Director, Mele Pucho ya musician aser worship leader ka lir. Pa ya Harmonic Voices Nagaland nunga managing director den ano Event Producer ka lir. Symphony Academy of Music Kohima ajanga guitar, piano, drum, vocal, cello, violin, bass guitar aser music theory indang course tem agütsür.

Kinungtsü tepsetba aitsür: MTLT

Dimapur, June 6 (TYO): June 2, 2017 nü Lolenwati-i pa kinungtsü Moarenla tepsetba khukhua aitsür ta Mokokchung Town Lanur Telongjem (MTLT)-i sangdong ka nung metetdaksü. Arishi küm 76 tain tebur kati taochi melii aser nisung taküm mapayui pei kinungtsü tepsetbaji tesempatsüka aser meimchiri meinyakba mapa ka

lir. Anungji, pa ozüing tapet kübok merenshitsu, ta MTLT-isa metetdaksü. MTLT-i ozüing amertem dang aibelensangji ozüing tapet agi merenshitsu ayongzüker aser pa bail nung mechioktsü mepishir. MTLT-i tasür kibong den asüku aser tejashi lemsateper, tir Imkummeren Jamir-i sangdong nungsa shia lir.

Shirurui takoksa bener arutsüba asadangtsü atema luden ka shim

Dimapur, June 6 (TYO): Arem shirurutemi meimchir taküm samatsüba mesüra shiruru/tsünüsenbongtsü/kiojen raksatsüba aser takoksa bener arutsüba tatalokbatem asadanga teyari agütsütsü atema Nagaland sorkari luden ka shimogo. **Luden nung züngsemtem:** 1. The Concerned Deputy Commissioner - Chairman

- 2. The concerned Wildlife Warden - Member Secretary
- 3. The concerned Territorial DFO - Member
- 4. The District Agriculture Officer - Member
- 5. The District Veterinary & Animal Husbandry Officer - Member
- 6. The District Horticulture Officer - Member

'Milk & Milk Products' indang metetdaksür

Dimapur, June 6 (TYO): Nagaland sorkar nung Animal Husbandry & Veterinary Services Department-i Milk & Milk Products ji Nagaland

Essential Services (Maintenance) Act 1978 nung Arlla 2 (a) (ii) kübok Essential Services ta züngoker ta sangdong ka nung metetdaksü.

World Environment Day Amungba Osang



Ministry of Environment, Forest & Climate Change-i World Environment Day Workshop ayongzüka agidang Fazl Ali College, Mayangnokcha School, GHSS Dilong aser QMHSS Mokokchung nungi cadet tem agiba noksa ka angur.



GHSS Aboi nung 25 NLI Coy NCC kübok cadet temi World Environment Day amungba noksa nung angur.



Woodland High School, Zunheboto Cadets nung cadet temi parnok school temeket nung süngdong 100 atemba sentong agidang tangokba noksa angur.



Queen Mary HSS kaketshirtemi merükmeju mapa inyakba noksa nung angur.



Zunheboto nung Marry Hill High School nungi NCC cadet temi totzü pongdang tazüing agi yangluba dustbins alem dang agiba noksa ka angur.



Mokokchung, June 6, 2017 : June 5 nü World Environment Day nungtem nung Govt. Middle School Longkong staff aser school tanurtemi school kilem aser temeket merükteta süngdong kar tema yutsür tangokba noksa nung angur.



Mongsenyimti Watsü Telen-i alima rangben den tsüngkang medema Lipokum Anogo (June 5) amungba nungtem yimsüing nung nungo tesemtem merükteta tobur tajung narotem temtsü. Alima aser temeket tesem merüka ayutsü nukla nung Watsü Telen ajanga kibong ajaki Ungkun (waste pit) ka-ka yanglua jana (waste) intoka rongtoktsü tetuyuba agütsüba kasa anogo nung meita oa repranga nübur nem tangatetba agüja lemsatep.



Longsa Eagle Club tenzüker küm 50 ajungba nungtem 'World Environment Day' nü club züngsemtemi Longsa yim aser temeket nung süngdong atemba mapang tangokba noksa nung angur. June 5, 2017

Hindi oshi official kuma amshitsü shisalemsatep



Shillong, June 6 (Agencies): Linük nung kin aser lokti ajak longjemshitsü mechi nung Hindi official oshi ama amshitsü asoshi sensaksemtsü atema 'Use of Hindi as Official Language' workshop anogo ana kaogo.

North Eastern Council (NEC) nung iba anogo 2 workshop ya Mongolbarnü tembangogo. Iba sentong ya Ministry of Development of North Eastern Region (DoNER)-i ayongzüka aka aser linük nung kin aser lokti balala longjemtsü aser tesenep nung alitsü nükjidong nung Hindi official oshi ama amshitsü asoshi tebilemdangbatem lemsatepa liasü.

Workshop lapokba setong nung Hindi Salahkar Samity, Ministry of DoNER nung züngsem Dr. Rajendra Singh Chandel, Shastri Vipan Khajuria, Dr. Balwant Shastri, Dr. Lakshmi Narayan Mittal, Ms. Sujaya Dey aser Dr. Kshirada Kumar Saikia nungeri northeast nung tongtibang nisungtem indang taküm otsü Hindi aser India nung oshi tanga nung zülua adoktsüba onük nung tali temolung agüja jembli.

Maneni tang sentongtem, Dr. Shailendra Chaudhuri, S.P. Singh aser Manas Ranjan Mahapatra nungeri achaayanga aka. Adviser Shri D. Khound, Adviser Gautam

Chintey, Director, Sille Anthony, Director Edwinson Swer, Superintending Engineer Doba Jini nung den külemi NEC nungi ketdangsertem aser North Eastern tesemtem nungi Ministry of DoNER kübok lokti balala nungi züngsem tem adenshia iba sentong nung o lemtepa nung shilem agi.

India nung Hindi official oshi ka ama amshitsü asoshi tebilembatem aser tebilemstütem lemsateptsü asoshi tarutsü nung Ministry of DoNER-i achaayanga North East nung tanga tesemtem nunga iba amala mesükba workshop akatsü asoshi sentong aliba NEC ketdangsertemi metetdaksü.

Pelaba Lemsateper

"Pa arishi tatembanglen pa dang meimba temeimji kanga tulu liasü, ibaji o agidangbo temulung süa meshitetter".



17/2/1931 - 1/6/2017

Temeim obala **P.S Meren Jamir** aser ozü kibong dang mapang ajak nung aser tang pa alima nungi pilar onok mangyim jashi nung ali tashi, shirnokisa kanga meima yaritepogo, nenok ajak dang onoki kanga pelaba lemsateper.

Tsüngremer tesüngmangtsü taochi ajanga nenok ajak moajangma.

Mrs. Tarenkala aser kinungertem..

Tibet nung ana Buddha süngyanglu ka auyaba atema apu



Itanagar, June 6 : Delhi police-i Hombarnü Delhi kübok Majnu Ka Tilla tesem nungi Tibet nung nung nisung anati küm 900 tain Lord Buddha indang süngyanglu ka ayoktsü merangya lia pur anir aoba yangi noksa nung angur.

Itanagar, June 6 (Agencies): Delhi police-i Hombarnü Delhi kübok Majnu Ka Tilla tesem nungi Tibet nung ana küm 900 tain 'Lord Buddha' indang süngyanglu ka ayoktsü merangya lia apu. Iba süngyanglu ya Arunachal kübok Tawang district nungi aouyaba liasü.

Police-i ashiba agi, osang tejangja ka angazükba sülen 'Crime Branch sleuths' telok kati Ngawang Tsundue (29) aser Lobsang Gakey Sherpa (26) na anepdang 10:00 ako shi nung apu. Iba süngyanglu ya Majnu Ka Tilla tesem nung Gurudwara ka anasa talir takar ka dang sen crore 1.40 yong ayoktsüba liasü.

Tsundue ya Himachal Pradesh kübok Kangra tesem nung alir aser Sherpa ya Majnu Ka Tilla tesem nung Punjabi

Basti nung alir, ta police-i ashi. "'Terton Pema Lingpa' süngyanglu ya Tsundue-i May 31 aser June 1 aonung tsüngda nung Arunachal, Tawang nung Sangyeling gompa nungi 'Cheepa' tekolakbaer kidang nungi aouya. Iba ajanga Arunachal nung tipmedemi liasü," Deputy Commissioner of Police Madhur Verma-i osangbenertem dang ashi.

"June 4 nü tamangba yimsü dak sendakba nung süngyanglu ka aouyar north Delhi nung ayoktsü merangba osang tejangja ka police-i angazüka liasü. Kasa osang ajanga iba süngyanglu ya sen aika ajangzüktsü nükjidong nung Tibet-i shibelener aotsü liasü ta metetdaksü," ta Verma-isa ashi.

Tsundue aser Sherpa ket nungi ngutetba süngyanglu ya

aso 12buba AD indang lir aser Buddhist nung atema kanga tongtibang lir. Iba süngyanglu ya international shishilembadak crore aika alang lir.

"Bushisüngdangba mapang, Tsundue-i police tem dang ashiba agi, Pa Tibet nung lir aser 2009 küm India-i aru. Pa Himachal Pradesh, Dharamsala nung lia alidang Tawang Cheepa tekolabaer jala den metettepa aküm aser tena 2011 küm kibong aküm. Tsundue-isa ashiba agi, mapang tatsüka tsüngda nung tena balaadok. Iba sülen nungi pa Cheepa'er kibong den tsükchitepa aru. Pai 'Terton Pema Lingpa' süngyanglu par kidang aliba jangjaa liasü anungji pai iba süngyanglu sen aatsü aser par kibong tenüng menüktsütsü asoshi aouya," ta Tsundue-i ashiba Verma-i metetdaksü.

Mizoram nung National highway-54 mokdang

Aizwal, June 6 (Agencies): Mizoram aser Assam aartsü nung aliba Kolasib district nung kaketshir lokti balala aser NGO temi NH-54 nung anogo telatet ka makai lenmang mokdangba sentong ka tanüp 5:00 ako nungi tenzükogo. Iba lenmang ya Mizoram atema tongtibangtiba lenmang ka lir.

Joint Action Committee (JAC)-i ashiba agi, Kolasib district nung aliba nüburtemi magütsüi surgeon ka belener aoba anema longka aita arudar aser tang agiba jenjang ya iba dak sendak ayongzükba lir.

Mizoram nung tang yimsütesüdak Congress sorkari ashiba agi, district mozüki nung tanga surgeon ka

lir aser parnoki iba jenjang agiba ya nüngdak makaba maparen ka lir.

Health Minister Lal Thanzara-i, state public service commission ajanga doctor talila 26 shimba sülen doctor-i anünga tebilemstü ya agintsü imlar ta ashi. Paisa ashiba agi doctor tem shimba maparen ya tang tangidak lir aser yakta parnok shima mapa nung anioxtsü.

Assam aser Mizoram na sendaktepdaksüba km 850 talang lenmang ya mapang talangka atema mokdangra, iba ajanga Mizoram nung tebilemstü adoktsü, kechiyong anogo shia nüngdakba osettsüset balala agi anünga akümtsü.

Meghalaya nung nashi shi menokdangtsü : BJP

Shillong, June 6 (Agencies): Nashi tepseta ayokba dak sendakba nung Centre telemtetba anema BJP party lenir ano ka mapa toktsüba sülen Mongolbarnü BJP puri Meghalaya nung nashishi nokdangtsü ta osang adokbaji teyazü ta shiogo.

Party-i ashiba agi, iba amala telemtetba ya state sorkari agitsü.

BJP pur Meghalaya incharge Nalin Kohli-i, iba teyazü osang prokshiba ya Congress pur dak tongloxtsü aser taruba küm election mechi nung yimden yimsüsüba onük ka kin o kin anema kümdaktsüogo, ta ashi.

Centre-i shishilembadak nashi tepseta ayoktsüba nokdangba anema North Garo Hills district BJP tir, Bachu Marak-i yashi BJP telok toktsüogo.

"Ni Garo nung tamangba aser tangatetba anema moutettsü kechiyong Garo nung lokti tejangraba aser

tebilemdangbatem kümzüka ayutsüji kü khuret lir. Nashi shi achiba ya onok sobaliba nung shilem ka lir," ta mapa toktsüba sülen Bachu-i ashi.

Kohli-i ashiba agi, parnoki pa mapa nungi anenba pelashishia agizükogo kechiyong pa party nungi indoktsüba dang liasü.

"Congress puri parnok ajangzüktsü mechi nung Meghalaya nung BJP puri nashi shi nokdangtsü meranger ta osang teyazü prokshir. Item osangtem kata ochi mali kechiyong asenok constitutional scheme kübok Centre nung aliba sorkari state sorkari telemtetba agiba alema meinyaktettsü," ta Kholi-i ashi.

Meghalaya atema BJP pur onük ka dang lir aji Ato Kilonser Narendra Modi indang 'Sabka Saath, Sabka Vikas' onük lir aser iba dak ajemdaker state nung terenlok bener arutsü nükjidong nung election nung tokteptsü, ta paisa ashi.



TIR YIMYIM

YIMOBILEM (EDITORIAL)

DIMAPUR WEDNESDAY, JUNE 07, 2017

CHIYONGTSÜBA OZÜNG

Linük nung kiset shiruru bener arua ayokdak shingai shi achitsü atema mayoktsü aser malitsü ozüng azüngba ya shi ayoker aser shi achirtem anema mebilemdangi inyakba mapa ka lir. Item shirurtem rongnung nashi, jang, sü aser ut nungertem dena lir. Tetezü, alu alaba mesüra nisungtem nungdak nung amshitsü atema ayoktsü aser alitsüba dak alaka shi achitsü atemabo item shirurtemji ayoktsü aser alitsü memelar. Atangji, India nung shi machiba yimsü amangertem teimba lir. Takoktsü ka dang süra shi machibaji temang asoshi junger, ajisüaka alima nung kin teimbakati shi achir asünungji shi machitsü ajungshitsüba dak alaka shi machitsü ozüng agütsüsbajibo shisataka mapa ka masütsü. Tang India nung center government-i nashi aser jang melepssettsü ozüng agütsüba ya shitakba agibo shiruru metepsettsüba ozüng kübok masü saka shiruru meima aser apayua amshitsüba ozüng " Prevention of Cruelty to Animals Act, 1960 (PCA)" kübok agüja lir. Iba ozüng yabo shi achirtemi balaka shiruru dang kanga maochii benschir, iba jagi tepseta achitsü asüyonga shiruru dang kanga meima benschitsü asoshi latettsüba ozüng ka lir. Atangji, shiruru dang meima benschitsüba yabo India nung government-i ozüng küma melatetdangyongi asenok Naga nung aser Aor sobaliba nung benschia aru. Aji oda, kasa tachitsü atema tepseter asüyonga shiruru taküm talangka mesüdaktsüi kangshidaktsüra asenoka taküm nung timtem tekangshi ajurur aser shiruru metsüba nung azükaru masür ta amanga arur. Ibayongji, nashi aser jangjibo yutsür an rangset dang dena talangka mekangshii yakta südaktsür. Ajisüaka, iba jagi shi achitsü atema shiruru metepsettsü ta masü saka parnoka taküm asünungji parnok dang meima aser aochia benschitsübaji asenok sobaliba akümer. Ajisüaka, tang Center nung BJP government-i shingai shiruru tepsettsü asoshibo tayoka mayoktsü aser talia malitsü ta ozüng latetbajibo linük nung külem sensosangertem shirnoki nashi shi aser jangshi achir parnok asoshi junga mebilemdangi renemba maka ka asütsü. India ama temeyoktep kin aser nübertem alidak iba ama langkotem ozüng ya mapa küma meinyaktettsü. Atangji, shi indang jembir asünungji asenoki shi achirtem asoshi dang bilemer, ajisüaka nashi metsürtem, shi alepertem, hotel amenertem aser shi agi chiyongtsü tapu balala yanglua ayokertem million aika mapa makai akümstsü. Ibaji linük nung yimten asoshi tebilemstsü tuluka asütsü. Aji oda, democratic aser secular lima ka nung sensosangertemi achiba aon tashi nung ozüng zünga yutsütsübaji government-i menügdakba mapa ka kanga süokia ia inyaker asütsü. Iba jagi tebilemstsü masütsüba mapatem agi meimlaba tebilemstsü tuluka küma linük nung timtem aser rongrong adoktsü ana nung dang lir. Atangji, ibai chiyongtsü dak aketba ken o lir aser linük nung senso purtem asoshi government-i kechi aon achitsüla aser kechi aonbo machitsüla, itemji lateta yutsütsübaji tim masü. Ibajibo state government asoshia tim mapa ka masütsü. Shi achitsü machitsübajibo senso ka mulung südaktsütsüla. Chinüra alima nung anguba shiruru shi ajak achitsüa akok. Ajisüaka, senso ka nem tangatetba agütsütsübaji tangu aser technü asaa masü saka shiruru taküm apayua aser meima inyaktsüla. Ibaji dang masü saka asenok temeyoktep lokti nung alir asünungji asen den külem alirtem shirnoki asenok achiba chiyongtsü machir, parnok akümstsüba asenoki awazütsüla. Shi achir asüyonga, Hindu nung tsüngdang kecha hau ta mali nashishi amshia sayubajia masü mesüra Muslim nung tsüngdang ak shi amshia sayubajia masü, saka alima nung asen kija alir masü aser melitettsü asünungji, mapa inyakyim aser sobaliba ajak nung tangar sobaliba aser tangar yimsüa akümstsüba benschitsübaji asenok senso shia teinyaktsü mapa asütsüla. Iba tangatetba nung Nagaland government-ia center government dang tang Nagaland nungbo nashi aser jang malep anentsüba ozüngji mebenschitettsü ta shiadoktsüla. Iba ozüng ya Assam kisüng nung mapa küma amshitet nunga süng, kenpiga lirbo Nagaland nung nashi shi aser jang shi seret nung sen meyirijang tema agiang angutsü !

OLEMSABANG

TEMOATSÜ ANGU, KANGA TSÜBU, ATENTEN, MEJANGA MELITET

- Imdang Ozüküm. E.Er.BSNL

(Taoba adok nungi...)

Iba asangur chanu dak Isaia 33:15-16:- shibai ochi shia jajar aser indangindanga jembir, shibai pei külakokjaa anguba tajangzük sempar, shibai sübokrem magizüktsü teka rüktoker, shibai azü tokshiba mangashitsü tenarong tangpanger, aser tamajung dak mereprangtsü tenük amuoadoker pa temalen alitsü, ta iba asangur chanu nem Tsüngremi apuoktsü sudi.Yob:1-8 Tsüngremi satan tebilemba meteta lir. Pai ashi, kü tenzüker Yob dak tenük yokogoma ? Pa ama alima nung tamajung sempaba shinga mali. Satani Yob rongsen aser shi nung tesama teimtem agi atitang.Saka Yob dak tanüla temeshi liasü.Yobi ashi, Yob 19:26 nung," Aser kü mang shizüka orr külen, shi nung mesüia ni Tsüngrem ngüküm.

Asangubai bilem südi, A.Shin 1:10:- Kü chir, temenen puri na mesüzükra nai hai haura teka.Iba asanguba ya mojingi tendangbaji rongsen agi atitang ta ni bilemer.Pai iba senji meyipa bener oa magütsü asübo, tzümarba kishi züng nung shisabolua mangmanga anepdang yakta nokdaka alibasangji, aonung sangwaa shisabolua memejang alitsü, iba sen yagi tenaprong memejangdaksü, kechiyong sen meimbaji temenen tera. Kodang pai senji meyipa agütsü, pa mulung tepela agi asüng, aser tzümarsang peladaktsübaji pa atema onsaraa senti mapa ka pai inyak, kechiyong tzümarbo ibala nungji soseta asütsü ana nung dang lir. Ni bilemer pai sen agutsüdangji tzümarba peladaktsübaji dang masu, saka pai nisungba takümjia kümzükogo.

Kibong nung mezüng tanur tebur chanu ka asodang pelaba denbo kanga agi tuluba tzümarbaji pelaa alitsü. Aser iba mapang nungji asen KibubaTsüngrem Koda teplaba alitsü kechiyong iba asangur chanu Tsüngrem mulung chidaktsü aser mojing kodaka jashia alitsü. Ibaji asen teyanglur atema kanga temulung asüba aser temulung achiba tongtipangtiba mapa ka liasü. Tzümarba jagi Naga nung ya kanga ochishir kin ka ta kanga tenüngsang agütsü. Asangur ka kisungi Naga nung kanga Ochishira ta tenüngsang aazükbaji koda jangratemtsü. Tanü Naga nung 100 nung ochishir 10 danga ali nungbo , Abraham-i Sodom Gomara mesamadaktsünüi kümzüküba ama, Naga lima yaa mesamai Tsüngremer sentong atalokdaksütsü. Ni bilemer iba senji pai odang senji agi nungbo pa tang ya koba jenjang nung lila ? Pa ya takar kümer shinga mengui lila asü ? Mesura jemseta sür leper telong nung mejanga lila, kechiyong Laishibai ashir, takar nisungi kodak yimlil aitsü dang nungibo ajem kii Ut(Camel) süitsü temelaba. Mathi 19:23-24.

Saka pai takok tashi temenenji kanga meranga nokdang. Anungji pa nem kinungtsü tajung ka moatsü, jabaso tajung ana (2) tazünger dang kümogo, tashidak melii kibong kanga pelasetajangratema alir. Kechi aka aji agi pelaa alibaji ajak dang tajungtiba. A. Shin 22:1-3 nung, Rongsen tulu dang nungi tenüng tajung shimtettsüla, aser hon aser taribi dang nungi maongka tajungba, takar o sensaker na külemi ajuruteper, parnok ajak teyanglurji Kibuba. Aser teti iba nisung angu dang kanga temulung nung kongshir aser temulung achir, Kibubai moajangma.

TRAIN STATION NUNG ASANGUR KA :-

Küm 35 shi süiogo asangur ka train station Dimapur nung kazüa nokdaka alidang tzümar tila tanur kati juli ka nung sen merijang Rs 40,000/-bener arua iba asanguba dang iba sen ya na samaa asü ta asüngdang , iba asangubai kü indang masü ta shir, iba tila tanurji Railway intep to ajanger oadok. Iba asanguba jagi yakta dang bilemtet, ni yabpushir ato, kanga dang pelara ta sür, meshizüka bener iba minute nungjisa kidangi tuadok asübo kanga jungla, ta kangasa kanga sasasetatubusangji bushidang, saka otemer pai dang tashi sasar ta ashir. Pa station metoktsüdangjisa Nepali nung ka pa sen merijang lir(Rs 40,000/-) samaogo, kari danga ngua lira imlipilema agüjang, ni senji terabo agütsütsü ta jepa arua nisung ajak dangji mepishia senzü, Saka iba mapangji Nepali nungba atemaji tesasatsüka Keyi (Tiger) chanu nem shi agütsü nung, mesura Tzüraba azü (dog) tekong nung shi alenloktsü nung meyipa angutsü masüji, aser shirong chanu asenoki meneptsü masüji, sen matoksangji jepa nokdaka yutsür paia kanga meimseta repranger kidangi atu ta ashi.

Ashi, pai senji tanur ket nung jagi meshizüker pa teka nung amer ken danga ata nung, tebushirji arudang pai senji agütsü nungbo pai mapa tajung ka inyakter ka asüba liasü, aser Nepali nungbaji ajangzükerba liasü.Pa Tsüngrem nungi koda temoatsü süla. Saka pai iba senji kü meyong masü ta ashibaji Tsüngremi pa kümzük ta bilemer. Iba ama Tsüngremer sentong ka aliba yong pa taküm Tsüngremi wazüka yutsü sudi ta Tsüngrem tenüng asanger. Kechiyong iba senji agi nung pa taküm melila, kechiba süra pai temesepba jemya liasü. Tangbo pa mapai yir, tetsür tajung ka agir aser jala jabaso tetemjen soa alima rongsen nung takar küma jangratema alir. Karbo Tsüngremi asaa dang meimer ta asübaji iba nisung yaa ka ta teti repranger .

Tsüngremi pa nem agütsüba sempet tulukaji pai tashidak aika puteta pa teka agi yariba ajanga tashidak aneper. Assam nungertemibo pa dang Doctor ta ka ajar aser temang teret aser tezü aser poknüng tashidak puteter. Pai yaribaji taneptsü aika angur. Iba temoatsü iba olem sapang nung lemsateper . Teyanglur Tsüngremi Iba osep tangatetba nung azünger ajak moajangma. AMEN.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

American Missionary Jacob Thomas Brahmaputra Ayong Nung Tepsetba

~ Tiala Imchen, Dimapur.

(Taoba adok nungi...)

Iba sülen ABFM Sibsagar nung May 24, 1841 nung lapok. Ibaji joko Mission Station pezübenbuba belena aruba liasü. Yamaji Missionarytemi timtem jenti agia Osangtajung bener arudang taküma lalua arur ang Sibsagar atong. Aser idangjibo tenem kin asoshi mangdang to ola makai liasü. Iba sülen küm 30 jungnüa lir külen Dr. & Mrs Clark Sibsagar Mission Station nung kaket menügdak inyaktsu asoshi 1869 küm aru aser iba mapang nung pai Naga nung Sibsagar nung senzüba ngua iba mapang nungi pai Naga tenem asoshi khuret bena arur, Naga tenem Ao kin dangi Osangtajungji bener atuba liasü.

Yisu Khrista alimai arutsü asoshi Yohan tama yoka lenmang renema ataba ama, aser Mosai Israel pur Egypt alar tia nungi anitet, saka Yihusoa ajanga ang Cannan lima tongdaksüba ama Miles Bronson-i tamang nüktzü jenti Naga kin asoshi yimdokba ngua Tsüngremi Dr Clark mapang Naga tenemi Khristar Osangtajung yokba liasü ta angateter.

Tanü Assam lima Dhola-Sadiya nung Brahmaputra apu kanga junga temdangba ngur Missionarytem kanga timtema India limai arudang Jacob Thomas iba Brahmaputra tzüym nung rong tila ka nung asüba otsü lepalua bilemtet nung pa asüba dang masü parnok Missionarytem nükjidong tulu yur asen lima tashi osangtajung bener aruba otsü ajaki meteta aliyongjia ano lesson revised asür amai lemsateper, Tsüngremi tazünger ajak moajang.

ANOGO ABEN TSÜNGREM DEN

MULUNGSENTSÜ NUNG TSÜNGTSÜNG

Tebangkatsü miim sangoktsüba tsüngtsüng.

- Mathi 27:19-25

Pilate dang tekümdangtsü ashi. Pilate tebutsi punmang ka punmang aser la punmang nung lai shidakbaji angu, aser kodang sak la tanela kanga tim atem. "Iba tai maketba nisung dak kecha tamajung teinyak."

Lenmang balala nungi asenok dangi tekümdangtsü arur. Khen-khen tembar dang nungi arur khen-khen Kibuba kodak tenyartem nungi arur. Asen mulungsentsü nung tekümdangtsü tsüngtsüng atemer ama jembir. Au, tekümdangtsü tejangja aser mapatemji sendaktepa liasü, saka... Pilate-i tekümdangtsüji magizük, aser mang ayangtsü jangrar putirtem nem Kibuba agütsü. Pilate-i pa mulung menendaktsü aser pa teka metsükdok! Tatalokba ka nungi jenbutsi koda tera merangdang asenoki jenbutsi tatemzükba lenmang bushir. Asenoki Kibuba kangki nung angenlok aser asenoki kangki azüker aser shiruru nem kichiba lapoktsür.

Tamajungba tanelai teti kü mapa tetshir, aser pa ji tetenzük nungi nisung tepseter lir. Ni Pa kodanga magizük, kü kibur kangki nung tanaben angenloktsü yoker asü, aser yimjak nungi maksüdaktsür asü?

Tanaben ni sarasademdi. Kü memeshiba aser mejungi shimba, tepsettsü jangraa shimba asoshi kü dang tai tokang, o Kibuba.

US & UK nati memendang Islam anema inyaktsüla: Franklin Graham

New York, June 6 (Agencies): United Kingdom nung civilian tem anema kiralongraba mapa kanga bulua inyakba nung ajemdaker, British aser United States sorkartemi memendang Islamic kiralongraba anema inyaktsüla, ta evangelist Franklin Graham-i ayongzükogo.

Taoba hopta London nung kiralongrartemi nisung 7 tepsetba aser 48 yirutsübaji Islamic State-i tenüng agiogo aser iba atema Franklin-i pa indang Facebook page nung tebilembatem metetdaksü.

Pa ya Billy Graham'er jabaso lir aser Billy Graham Evangelistic Association nung tir inyaker.

"9/11 nungi ni America dang Islam indang tesayubatem nung lendong lir ta shiyonga arur. Islam amangertem dang tekong tamajungtem sayur aser parnok

dang mamangertem tepsettsü aser yirutsütsü indang tesayubatem agütsür. Internet aser social media ajanga item tesayubatem tali awaa oa sayur aser iba jagi asenoki lendongtem ajurur" ta Franklin-i metetdaksü.

"Aiben Islam indang tesayubatem ajanga lanurtem ajungmesor aser parnoki Islam indang tsüngrem tenüng nung nisung tepseter aser tashiyim agi tetsürtem raksatsür. Asenoki Honibar aonung London nung iba telangzüba nguogo. Parnoki nisung 7 tepset aser 48 yirutsü. Muslim nungertemi iba ya Allah atema ta shiogo. Ita asem tsüngda U.K nung Islamic kiralongraba asemen atalokogo" ta paisa ashi.

May 22, 2017 nü Manchester yimti nung Ariana Grande indang kenten sentong ka nung bomb pokdaksüdang

nisung 22 asü aser 119 yiru. Iba mapa ya Islamic State-i inyak ta tenüng agiba metetdaksüogo.

Taküm March ita nunga Westminster, London nung kiralongraba mapa ka nung nisung 6 tepset aser 49 yirutsü. Westminster kiralongrar, Khalid Masood ji parnoki ajungmeso ta Islamic State-isa iba tatalokba atema tenüng agiogo.

"Islam nung lendong keta lir ta asübaji shitakba lir. Iba lendong ya kanga tulu lir. Iba atema asenoki tebilemtsü abentsüla aser Tsüngrem dang asen Tir, asen Congress aser Senate nem shisatsü agüjang aser linük atema kechi tim'ar inyakang ta sarasademjang. United States aser UK-i memendang mejanga aliba nung saaker mapa inyakang ta ni sarasadem" ta Franklin-isa ayongzük.

Temenen madak Tsüngremi tajung inyaker: Justin Bieber



Manchester, June 6 (Agencies): UK kübok Manchester yimti nung Ariana Grande indang kenten sentong nung kiralongrartemi bomb pokdaksüdang nisung 22 pokset aser aika yirutsü.

Iba lendong atema Manchester nung alirtem den alimai Deobar nikongtsütsü tasürtem mangyimba aser tetushi agütsüba sentong ka agi.

Iba sentong nung Ariana Grande den Katy Perry aser Justin Bieber nungeri "One Love Manchester" kenten sentong nung shilem agia liasü.

Küm ana tejangdang pop kentener Justin Bieber-i pa Khristan tamanger ka ta yimjak nung metetdakja liasü aser pai "One Love Manchester" nung

adenerkem dang teimla indang osang sangoktsü.

"Ammang tia nung alidanga Tsüngremi tajung inyaker. Temenen madak Tsüngremi tajung inyaker. Na kechi tia ka nung lidir liaka Tsüngrem nü den dena lir aser Pai na meimer aser Pa yangi na atema lir" ta Justin-i tesentepertem ayongzük.

"Iba lendong nung taküm samartem nem nia nenok den külemi tetushi agütsür. Onoki nenok meimer. Takoksa ajuruba kibongtem dangi onok temeim lemsateper. Onoki taküm samartem tushir aser meimer" ta paisa shisem.

Taoba hopta tu Justin Bieber-i Instagram nunga "Ni Yisu sülen anidaker" ta osang metetdakja liasü, ta CBN News ajanga ashi.

Medziphema Arogo nung Kibong Shisatokden agi

Dimapur, June 6 (TYO): June 2-4, 2017 tashi Medziphema Town Ao Baptist Arogo nung Kibong Shisatokden ka "Tsüngrem yimli abensadaksüba Kibong" omen nung amendaker Tetsur Telongjem Luden-i achayanga agiogo.

Iba shisatokden nung tongti O jembirji KABAAsso. Pastor, Wb. Sentsashi Aier liasü aser tebutem temeja, tetsütem

temeja, lanurtem temeja aser Inti senden balala lemsar agia liasü.

Arogo nung tebutem aser tetsütem 97 tashi tenüng züluoka aden. Tongti O jembiri tanü putu tendak apet shisalen tajung aika agüja arogopurtem temoatsü ngudaktsüba atema pa dang pelaba den külemi Tsüngrem tenüngsanga iba osang lemsateper, ta MTABA-i sangdong ka nung metetdaksü.

UNGER BAPTIST CHURCH.



Unger Baptist Arogo Women Department-i achayanga June 2-4, 2017 anogo asem Dorka Cell Group tanüla asentenshi sentong agidang tangokba noksa ka angur. Iba sentong kanga temoatsü ngua agi aser o jembirji Missionary Lima Imsong liasü aser Mrs I Anungla o Mrs Alemla nati counselor ama yaritep. Arogotsürtemi nenok ajak dang kanga pelar aser Tsüngremi nenok taküm aser wadang tali moajang ta sarasademtsür ta Asso. Pastor Women, Mrs Tajungla aser Women Dept Secretary, Mrs Tainla nati sangdong ka nung metetdaksü.

OLONG PAITEP # 4443

	1		2							3
4					5		6			
7										
			8							9
10									11	
								12		
13									14	
15										

TIPIEN

- 1. Aria bilema temeim sayu - (10)
- 4. O amentakdak - (4)
- 5. Anüng tsüngrular - (6)
- 7. Chiyungnü - (3)
- 8. Kilem enok - (5)
- 11. On _ _ _ a - (3)
- 13. Lenti ajurutepdak - (6)
- 14. Yangi masü - (4)
- 15. Shiruru rongnung chuba - (10)

LANGTSÜNGLEN

- 1. Menungra ata - (6)
- 2. Mali / Mait - (4)
- 3. Tzü ajemba oset - (5)
- 5. Temenemtsü tajung - (7)
- 6. Me _ _ _ _ ra - (4)
- 8. T _ _ _ _ ung - (4)
- 9. Shiruru tezü agi yangluba kongki - (6)
- 10. Teka amtep - (5)
- 12. Tzü manung senzüba - (4)

OLONG PAITEP # 4442 TELANGZÜBA

TIPIEN :

- 1. Yimbazüa, 6. Sama, 7. Jeptak,
- 9. Ola, 11. Tenla, 12. Azü,
- 13. Menden, 16. Lumi,
- 17. Makamait.

LANGTSÜNGLEN :

- 1. Yimten, 2. Menja, 3. Anep, 4. Asükwa,
- 5. Tai, 8. Tanen, 10. Tsüngi, 11. Temeim,
- 12. Anasa, 14. Dena, 15. Ele.



ALOKBA O TEBU NA OBANG MEPUTEPER

Tebu : Hi, Alok, tanübo kima atsü ya merük-merüka inyaker atang ta shir ni office-i ao nung kechiba meinyak-i atar??

Alok : Oba, tanübo kanga lemyiba agi asügang inyakdi ta ser meinyaki ata adi!!!

Tebu : Kodanga mapaji asüng ta anünga tedoktsü.

Alok : Hai, sürapangla joko nai ashiba angadi..

Nikongtsütsü Alokbai mapa inyaka sayur....

Tebu : Hi!!!, Alok, kechiba atsü nung teti ajak onzükadok?? Tazüjibo odang doktsütsüla atu, kümdangang, na ya sowar !!!!

Alok : Oba, nai kodanga asüng atema mapa anünga teyutsü ta ashiba tu ni mamai lir, iba tu bilemteta teti jia ajak oshia onzükadok adi!!!

Tebu : Oh!!!! ALOKBA.....

Lilir: IS, Dimapur

TANÜBO NAI LANGZÜANG

Q. Koba football club-i 2017 UEFA Champions League trophy takok angu?

- [A] Juventus [B] Milan
- [C] Barcelona [D] Real Madrid

(Taruba adok nung onoki langzüsü)

YASHI ADOK TELANGZÜBA : Leo Varadkar

Tepela Tasoba Anogo

Tanur asoba anogo nung salem osang den noksa angali adokdaksünura - Tenüng, Küm, School, Talidak & salem osang tejanga züfur, noksa (photograph - any size) ka den anogo 3 mesüra 4 jela e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng :

2. Tasoba anogo:

3. Küm : 4. Class :

5. School :

6. Talidak :

7. Salem osang :

NAIA YA METETER MA

RALANG ROAD

June 30 nungi July 8, 2017 nü tashi Karlovy Vary, Czech Republic nung 52buba Karlovy Vary International Film Festival akadang India nunger tenüng nung Nepali-Hindi film Ralang Road-i shilem agitsü. Küm 13 tetsüngda lir sülen ang tang India nunger film-i International film den tokteper asütsü. Iba film ya nisung pezü Himalaya tenemtsüng nung aliba otsü ka lir aser iba film ya Karma Takapa-i direct asü aser HumanTrail Pictures ajanga produce süa yanglu.

SUDOKU # 3556

2	6	1				4	9
7			3	1	2		6
	3			6		1	7
1		3	5			6	8
		9					
			8			9	1
			2			7	
				4	9	5	2
3	5	2	1				

TELANGZÜBA # 3555

6	9	4	1	3	5	2	8	7
5	3	7	4	8	2	1	6	9
1	2	8	7	9	6	5	4	3
8	6	5	2	4	3	7	9	1
4	7	2	6	1	9	8	3	5
9	1	3	5	7	8	6	2	4
7	5	9	8	6	4	3	1	2
3	8	1	9	2	7	4	5	6
2	4	6	3	5	1	9	7	8

OJANG LUTEP # 4051

- ALANAGND :
- NGNU :
- OGNDGSÜN :
- WIKKA :
- ERLIDKODP :
- IKAPAJI :
- MTATESÜ :
- ERAMNG :
- GNUNA :
- NGJULA :

OJANG LUTEP TELANGZÜBA # 4050

TANÜ PUTU NUNGBO KANGA SAAKSALEMA ALIRTEMI DANG MAONGKA AIKA ANGÜTSÜ

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries
21/3-19/4

Nü molungjang nung tajungshiba balaka alitsü aser iba ajanga nü inyakyim mebilemdangtsü südi. Tanü nai tangar kanga kümdanga amshitsüla.




Taurus
20/4-20/5

Tanü na asoshi anogo tajung asütsü aser nai mapa junga inyaktettsü. Nü dak kenten menü sempet alibatem bushitettsü merangang.



Gemini
21/5-20/6

Na lokti nisung ka süra tanü nai meimba mapa kar medemertem den lemsatepang. Iba ajanga nür medemertemi nü dak tejangraba sempet ajitettsü.



Cancer
21/6-22/7

Nai jangraba mapa tem nai nür kinunger aser medemertem den lemsatepang. Iba ajanga na asoshi tarutsü anogotem nung lenmang lapoktsütsü.



Leo
23/7-22/8

Nü dak aliba jakla kar nai tangar dak bushitsü südi. Medemertem den külemi aliba mapang na asoshi dang bilemra tesendaktep raksatsü südi.



Virgo
23/8-22/9

Nü mapa aser nü tejangrabatem agi na temangmangdaktsü. Nü temang asoshi chiyongtsü tajung kar anepalua achitsü anogo tajung asütsü.



Libra
23/9-22/10

Tanü nai timtem majurutsü anungji nai jangraba mapatem inyakttsü merangang. Saka jenjang makaba mapa nung nü mapang teindok.



Scorpio
23/10-21/11

Na asoshi o tamajung jembitsüra nai mangashi amai yujang. Aser tajangzük aliba mapa tajung kar nai bushia inyakttsü merangang.



Sagittarius
22/11-21/12

Nai saisapong nung shilem agitsü aser shisatsü anguba mapa inyakttsü jangratsü südi. Aser tanü nai item mapa inyaka anogo süyidaktsütsü.



Capricorn
22/12-19/1

Nai jangraba mapa balaka malitsü saka nai mapa inyak tenzükba sülen tejangraba arutsü südi. Saka tanü nai jangraba mapa kar bushiang.



Aquarius
20/1-18/2


Nai lokti aser yimden indang ken o tem jembitsü jangratsü. Anungji tanü nai jembishinü aika nung shilem agitsü maongka angutsü südi.



Pisces
19/2-20/3

Tanü nai mapa agi mela-mela alaktsü südi. Anungji mapang meindoki inyaktettsü maparen kar bushia inyakttsü merangang.

'A Gentleman - Sundar, Susheel, Risky' August 25 nü sayatsü



Mumbai, June 06
(Agencies): Actor Sidharth Malhotra aser Jacqueline Fernandez nati tang mezüng film ka nung shilem agitsü, aser film tasenba "Reload" nungjaji "A Gentleman - Sundar, Susheel, Risky" ta melenogo, ta osang ka ajanga metetdaktsü. Tenati Hombarnü action-comedy indang video ji tatsüka

lemsatepa liasü. Iba video nungji music den oren ka nung "Banduk meri laila" ta ashir aser video nungjisa Sidharth-i prangpong amer aser Jacqueline-i naro ka amer tena jakji film nungja ojangtem agi nembanger sayur. 'Sundar, Susheel, Risky' olongtem jagi "gentleman" kati koma ka asütsüla, ibaji rasa-a ashir.

Sidharth-i twitter ajanga, "Sundar, Susheel, Risky ni ajurutsü renema liang. 'A Gentleman...indang noksa tatsüka reprangdangang'" ta ashi. Iba film ya Fox Star Studios-i produce asür aser Raj & D.K-i direct asü. Iba film ya August 25, 2017 nü sayatsü..

Jackie Chan-i Astana nung film festival lapoktsütsü



June 06, 2017: Hollywood actor Jackie Chan-i Astana nung Chinese Film Festival lapoktsütsü.

Iba festival tenzükba sentongji June 7, 2017 nü agitsü. Iba festival tayongertemji Kazakhstan TV Channel, China's State Administration of Press, Publication, Radio, Film & Television, China film group aser Kazakhtele film lir. Iba sentong ya Ministry of Information & Communications aser Ministry of Culture & Sports, Republic of Kazakhstan-i nungita akatsü.


July 7 nungi July 18 tashi iba sentong akadang Chaplin Cinema Theater nung film trok sayatsü. Iba festival ya Jackie Chan-i tongti shilem agiba comedy action film, Kung Fu Yoga agi tenzüktsü. Iba festival nung Jackie Chan-i red carpet nung jajatsü aser Kazakhstan TV Channel-i red carpet sentong live sayatsü sentong lir.

Tiger Shroff-i Munna Michael nung ni tsüngsangtsü yari: Nawazuddin Siddiqui

Mumbai, June 6
(Agencies): Bollywood nung actor Nawazuddin Siddiqui-i ashiba agi, Bollywood nung lanur actor tem ama pai metsüngsangteter, saka parnokden kasa tsüngsangtsü asoshi merangdangtettsü. Nawazuddin ya taruba film Munna Michael nung Tiger Shroff den külemi shilem agiba angutsü. Tiger-i kanga junga tsüngsangteter aser pa iba atema kanga nungtugu lir. "Ni tsüngsanger ka ama film nung shilem magitettsü saka film mashi ka nung tongti shilem aginer. Tiger aser film nung shilem agirtem ajaki iba film nung ni tera tsüngsangtsü asoshi yaria liasü. Tiger-i tsüngsangba den shilem 5 shi meneptepa tsüngsangtet amai ni bilemer," ta Hombarnü Munna Michael trailer sayaba mapang Nawazuddin-i ashi Nawazuddin den film nung shilem agiba tajungshiba indang

asüngdang dang Tiger-i yamai ashi, "Nawaz-i shilem agiba ajak nung pa y i m y a melenshir aser aji jilushir tajung yimya ta ni bilemer. Ni actor ka ama iba film nung pa den shilem agiba ajanga aika angazükogo." Nidhhi Agerwal atema iba ya mezüngbuba film lir. "Ni iba film nung Nawaz den külemi shilem agitsü asoshi maongka anguba ya kanga dang tia taka lir. Pa kanga dang ajemaluba aser tarenzük aliba nisung ka lir. Tiger den medema tsüngsangtsü asoshi kanga tasak lir saka ni akokba tashi tajungtiba tsüngsangtsü asoshi


merangdangogo," ta lai ashi. Olulu ajanga Tiger aser film director Sabbir Khan na tsüngda mangatettep lir ta jembiba jangjashitsüa Tiger-i ashiba agi, "Ni mezüngbuba film nung pa den külemi inyak aser iba mapang nung pa kü tesayur liasü aser tangbo ba kü adianu ama kümogo." Iba film ya Viki Rajani-i produce asütsü aser July 12 nü sayatsü.



TAN HOPTA ATEMA - KOMA SÜLA ?

Q Nagaland nung tzü mopong merükteta yunüba temaittsü ka sayua Deobar nü amangba purtem ajak tenla kidangi aodang gari mebeni tetsüng agi ao nunga koma süla?

Olong 20 shi nung June 09, 2017 tashi nung iba telangzüba ya onok dangi e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Deobar nü adoktsütsü.



KOLKATA, JUNE 5: Raabta film ajungkettsü mechi Actor Sushant Singh aser Actress Kriti Sanon-nai Kolkata semdanga osangbener den senden amendang tangokba noksa nung angur.

Lipstick Under My Burkha sayatsü asoshi temelaba nguogo



New Delhi, June 6 (Agencies): Lipstick Under My Burkha director Alankrita Shrivastava-i ashiba agi, Ekta Kapoor Alt Entertainment-i iba movie present süa lemshitsüba atema kanga pelaa bilemer. Iba film ya nübur aika dang sayutsü tetemsü, ta lai shisem.

"Ekta Kapoor Alt Entertainment-i 'Lipstick Under My Burkha' film present süa lemshitsüba aliba maparen ya kanga jangratema pelaa bilemer. Iba film ajungketsüba ya kanga jangratemtsüka asütsü. Iba film ajanga nübur aika tongtettsü ta imlar," ta Shrivastava-i ashi.

'Lipstick Under My Burkha' ya alima ajunga nung film

festival aika nung shilem agia takok nguogo, saka linük nung censor board den mangatettep aliba ajanga mesayateti lir. Parnoki certificate magütsüba kuliji, iba film ya tetsürtem dak tali rangloker yangluba film ka lir aser aji dang masü film nung tiem masüba o jembiba aser shi nung medemba shilemtem kar tem aliba ajanga sayatsü asoshi temelaba magütsü.

Mapang talangka iba dak sendakba nung censor board den mangatettep adoka arur tawa taoba hopta 'Film Certification Appellate Tribunal's' ajanga tetuyuba agütsüba nung ajemdaker iba film nem certificate agütsüogo.

"Onoki iba film theatre tem

nung ozüing meraksai sayatetsü asoshi raraa aruogo. Iba film ya tajungtiba nung sayatsü langa lir," ta Shrivastava-isa ashi

"Tetsüri yangluba tetsürtem indang film yanglua reprangtsüla. 'Lipstick Under My Burkha' film India nung sayaba ya India nung tetsürtem ajak atema pelatepba mapang ka asütsü. Kechiba tetsürtem indang miim maparentem, temeim amala otsütem yanglua mesayatsü? Asenoki asenok temeden khanga tetsürtem dak ajemdaker yangluba film reprangti," ta lai maneni shisem.

Iba film ya Prakash Jha-i produce asü aser Konkona Sensharma aser Ratna Pathak Shah nungeri tongti shilem agir.

April nung 4G download speed Reliance Jio temaba liasü: TRAI



New Delhi, June 06 (Agencies): April ita 4G network speed nung Reliance Jio indang network tekaraba liasü aser iba network indang download speed tekarabatibaji second ka nung megabit 19.12 liasü, ta Telecom Regulatory Authority of India (TRAI)-i sangdong.

TRAI ajanga data download speed ya MySpeed application

amshia tendanga liasü. Iba tekara ya asadanga Bollywood movie ka minute pongu nung download süteter aser iba tekara ya second ka nung megabit 16 lir.

March ita nung Reliance Jio indang download speed ya second ka nung megabit 18.48 liasü aser April nung bo iba speed ya second ka nung

megabit 19.12 junga liasü, ta osang ajanga ashi.

April ita nung Idea Cellular indang download speed ya second ka nung megabit 13.70 liasü aser Vodafone indang download speed ya secong ka nung megabit 13.38 liasü.

Vodafone India aser Idea Cellular külemi longjemtsü sangdongba sülen linük nung iba mobile phone operator ya tulu rongnung ka kümogo aser shishilembaba nung shilem 35 kuma sen billion \$23 tashi tongteta lir.

TRAI ajanga ashiba agi Bharti Airtel indang download speed April ita nung second ka nung megabit 10.15 liasü.



Hyderabad, June 6: Mongolbarnü Hyderabad nung Desire Designer Exhibition tenzükba sentong nung Desire Designer Exhibitions, Chief Organizer Anita Agarwal aser Miss India Beautiful-2017 nung tetoktepertem noksa nung angur.

GST ajemtsü asoshi cellular operator temi Finance Ministry dang mepeshir

New Delhi, June 06 (Agencies): Telecom company balala ajanga tentetba telok-i sorkar dang parnok company dang Goods and Service Tax (GST) shilem 18 meshiba ya ajemtsü asoshi temepeshiba shidi ka züluogo.

Iba telok, Cellular Operators Association of India (COAI) ajanga züluba shidi nung parnok senotsü agi tim atemba shia lir.

"...telecom industry ya senotsü agi kanga tim atemba mapang ka lir, anungji iba GST rate ya tajemba kümdaktsüsüla aser iba ajanga tang aliba khuret tali mükemdaktsüsü," ta COAI ajanga Revenue Secretary dangi züluba shidi nung shia lir.

GST Council ya June 11 nung senden ka mener, chiyongtsü aser oset tabu balala nung parnoki tax meshitsü jenjang ateter sangdonga aliba nung tashishitsü mesüra tereprangshitsü alibatem reprangshiyimtsü aliba mapang matongdang iba shidi ya zülü.

Tawa GST tasen yangluba nung tang agia aliba tax dang nungi jenjang temaba-i

ajungketja alirtem indang tebilemba tem reprangshitsü, ta Finance Ministry ajanga tetuyuba agüja lir.

"Telecom nung tax shilem asem aki tali kümdaktsüba ajanga revenue tali kümdaktsüsü aser company dangi sen aitba nung ajemdaker tarutsü atema sentong yangluba nung tetsükdaktsü alutsü," ta COAI indang shidi nung shia lir.

Iba yongji tajangzüng kanga ajema angutsü, ta iba shidi nungsa shia lir.

COAI nung ya Bharti Airtel, Vodafone, Idea Cellular aser Reliance Jio amala company ya züngsem lir aser parnoki ashiba agi, telecom ajanga amshiba diesel aser electricity bo GST nung mali aser iba ajanga tajangzük balaka magütsür.

"Iba GST indang tax ajanga telecom sector ya kanga kangshitsü," ta parnokisa shisem.

GST Council ajanga telecom service nungi tax shilem 18 agitsü lemteta lir. Tang telecom service nung sorkar ajanga tax shilem 15 agir aser itemji phone bill nungi agizüker.

One Love Manchester concert ajanga sen million \$3.5 aazük



June 6, 2017 (Agencies): Taoba ita Manchester nung Ariana kentenba sentong tembangba sülen bomb lendong nung takoksa ajururtem atema 'One Love Manchester concert' Deobarnü katsüba kanga takok ngua agiogo.

Iba kentenba sentong nung Grande, Katy Perry, Justin Bieber, The Black Eyed Peas, Coldplay aser ano tanga kentener aikati shilem agia liasü. Iba sentong ajanga sen moillion \$3.49 azükba British Red Cross ajanga metetdaktsü.

British Red Cross' puri achaayanga "We Love Manchester Emergency Fund" tendenba ajanga tang tashi nung sen million \$13 aazükogo.

"Benefit concert ka atema jembu tenzükba mapang nungi ni iba tebilemdangba kanga jangratema bilem saka Ariana-i shilem agitettsü magutetsüar mejangjai liasü. Anogo ana lir külen lai kü dangi call asü aser lai langkabo inyaktsü nungdaker ta ashi, aji ta mesüra asürtem

amajok nung asü ama lai bilemer ta ashi," ta Ariana manager, Scooter Braun-i ashi.

Iba kentenba sentong nung nisung 50,000 shi adenshia telungjem, taneptsü anguba aser tepela aonung ka kümdaktsü.

Grande-i shilem agiba mapang nung pai nüburtemi iba kentenba sentong nung arua shilem agiba atema tenüng sanga liasü. "Ni nenok ajak kanga meimer aser nenoki temeim aser telungjem sayuba ya tanga alimai kanga nungdaker," ta lai ashi.

Arishi küm 23 tain US tsür kentener yagi iba sentong nung Miley Cyrus aser Black Eyed Peas purdena külemi shilem agi aser iba den külemi sentong nung ano Katy Perry, Coldplay, Robbie Williams, Liam Gallagher aser Justin Bieber nungeri dena shilem agi.

Iba kentenba sentong ya Old Trafford cricket ground nung aka aser tesem balala nung nisung million 14.5 shi-i repranga liasü.



June 6, 2017 nū Mumbai nung Union Minister for Urban Development, Housing & Urban Poverty Alleviation & Information & Broadcasting, M. Venkaiah Naidu den Maharashtra Chief Minister, Devendra Fadnavis nati osangbener senden ka nung o jembiba angur. Noksa nungsa Maharashtra Home Minister Prakash Mehta angur.

Madhya Pradesh nung police-i aluyimer 5 khaset

Bhopal, June 6 (Agencies): Mongulbarnū Madhya Pradesh kübok Mandsaur nung police-i lungkak aiterem dang injang khaloktsüdang aluyimer 5 khaset.

Anogo trok tashi aluyimertemi loan agütsüba meyipa magütsü aser parnoki tsünusenbongtetba atema jenjang shitak atakzükjang ta takhangba agüja arur.

Tanü tatalokba atema bushisügang ka asütsü tuyuogo.

Lungkak aitba ajanga Mandsaur, Ratlam aser Ujjain nung internet service shibangogo aser külen Rashtriya Kisaan Mazdoor Sangh-i Bodbarnū state ajunga mokdangtsü ayongzükogo.

Mongulbarnū, Madhya Pradesh CM Shivraj Singh

Chouhan-i tasür kibong shia nem sen lakh 5 teyari agütsütsü ta sangdongogo. Ajisüaka, Shivraj Singh-i Congress dak tai tongloktsü aser pai ashiba agi, "timi dang agia aliba sentong nungi ozüing alema inyaktsüsa Congress-i ajungmeso."

"Ozü sorkari aluyimertem atema aika inyaktsüogo. Onoki parnoki takhangbatem aika langzükogo. Congress teloki tasa atonga ozüing alema mapa inyakdaksü" ta paisa metetdaksü.

Congress tatong tir Rahul Gandhi-i Twitter nung, "iba sorkar yagi asen linük nung aluyimertem anema rarar. BJP'er new India nung aluyimertemi temeten meshidang injang agi langzür" ta ashi.

Hombarnū MP Chief

Minister-i ashiba agi, "iba sorkar ya aluyimertem indang sorkar lir. Aluyimertem indang tebilemstütem atema nüngdakba mapa ajak inyakdar."

"Tsünusenbongtsütem minimum support price (MSP) nung alizüktsü atema Rs 1,000 crore stabilisation fund ka tenzüktsü" ta paisa shisem.

Paisa aluyimertem dang, "MSP nung aliba ama piyas seret nung sen 8 agi alizüker aser onoki Indore, Ujjain o Mandsaur district tem nung piyas alir aser ibaji June 30 tashi aotsü."

Chief Minister Chouhan-i Deobarnū aluyimertem den ajurutepa senden amenba sülen aluyimer telok anati lungkak aitba sentong athi saka tanüingba teloktemi maneni lungkak aiter.

Nashi tepsetba aser shibelenba atema NSA & Gangsters Act kübok aitsütsü

Lucknow, June 6 (Agencies): Nashi tepsetba aser mamatzü atema metsüba shirurutem ozüing alema shibelenertem National Security Act aser Gangsters Act kübok tai tongloktsütsü, ta Uttar Pradesh police-i tanü metetdaksü.

Iba tetuyuba ya UP Director General of Police, Sul Khan Singh-i district ajak nung police tanishirtem dangi yokogo.

Taoba Akhilesh Yadav'er sorkar mapang nashi tepsetba aser mamatzü atema metsüba shirurutem shibelenba nokdangtsü atema tetuyuba agütsü saka ibaji mapa küma meinyak.

"Nashi tepseter aser mamatzü atema metsüba

shirurutem shibelenertem NSA aser Gangsters Act kübok ken o benoktsü" ta DGP-i metetdaksü.

NSA kübok sorkari nisung ka tepuokdak kobi ka yunüdir ayutsü aser ketdangsertemi kechi atema apu'ar osang memetdaksütsü koka lir.

Gangsters Act kübok ken o benokertemji police record nung züluoka aliba telok ka nung züngsem ka akümer. Iba ajanga police-i tai tonglokja aliba nisung mita repranger aser parnok anema ken o tasen mebenokyonga, asüngdangyatsü atema local police station-i jaoktsü akok.

DGP-isa district ajak nung Senior Superintendent of Police

(SSP) aser Superintendent of Police (SP) dang nashi kümzükba, tebur tetsür medemba aziükba, tamangba yimsü melenba anema nokdaktertem aser mamatzü atema metsüba shirurutem shibelenba nokdangba tenüing amer ozüing alema mapa inyakertem aziüktsü atema tetuyuba agütsüogo.

UP nung 'gau rakshaks' mesüra iba mesükba teloktemi nashi tepseter ta asüba tesemtem nung adenshiba ajanga traffic jam adoktsüba, nisungtem züka merenshiba aser loktii ozüing alema mapa inyakba tatalokbatem ajuruba sülen DGP-i iba tetuyuba agütsü.

CBI-i Prannoy Roy'er kiojentem mita aoba aitsür

New Delhi, June 6 nung sen apuba meyipa (Agencies): CBI-i NDTV network indang co-founder Prannoy Roy'er kiojentem mita aoba ajanga Emergency anogotem bilemteter, ta Mongulbarnü Kerala chief minister Pinarayi Vijayan-i ashi.

CBI-i Prannoy Roy aser pa kinungtsü Radhika Roy na kiojentem mita aobaji Narendra Modi'er sorkar indang tasa ka lir. Centre anema jembirtem aser nokdaktertem ola nembangtsütsü atema iba mapa inyaker, ta Vijayan-i ashi.

"Centre sorkari ozüing amertem aser CBI amshia mang ayangtsü meranger aser iba inyakyim ajanga ni Emergency anogotem bilemteter. Iba ya media ola nembangtsü inyakyim ka lir aser nisung ajaki iba mapa anema ola adoktsüla" ta paisa metetdaksü.

Hombarnü CBI-i Delhi aser Mussoorie nung Roy'er kiojentem mita ao. Parnoki bank

magütsüba atema iba ta inyak ta CBI-i ashir.

Prannoy kinungtsü Radhika Roy ya CPM politburo member Brinda Karat tenu lir.

Mongulbarnü Press Club of India-ia iba mapa atema

tebilemstü abenba metetdaksüogo aser media amokbangtsü mesüra aziüktsü merangba inyakyim ajak khukhua aitsür, ta parnokisa ashi.

"CBI-i NDTV kiojentem mita aoba atema onoki süoki ia bilemer" ta PCI tir Gautam Lahiri-i ashi.

Ano, Kashmir Editors Guild (KEG)-ia iba inyakyim aitsüba osang metetdaksüogo.

Prannoy Roy'er kiojentem mita aobaji media nembangtsütsü merangba inyakyim ka lir aser iba ya ajanga yimjak nung memetdaksüi emergency maparen inyakba ka ama lir, ta KEG-i sangdong ka nung ashi.

Trump-i Paris tenangzüktep atema bilemdangtsü imlar: Rajnath Singh



June 6, 2017 nū New Delhi nung NDRF-i ayongzükba "Capacity Building of SDRFs-2017" National Level Conference lapoktsüdang Union Home Minister, Rajnath Singh-i NDRF Inter Battalions Professional competition nung takok angur nem sempet agütsüba angur. Noksa nungsa Additional Principal Secretary to the Prime Minister, Dr. P.K. Mishra aser DG, NDRF, R.K. Pachnanda na angur.

New Delhi, June 6 June 1, 2017 nū US tir (Agencies): US tir Donald Trump-i Paris tenangzükba nung madenba osangji India atema taoksatsü osang ka liasü saka America-i iba telemtetba meyipa repringshitsü imlar, ta Home minister Rajnath Singh-i Mongulbarnü ashi.

Anogo ananü atema 'Capacity Building of State Disaster Response Force-2017' tenzüktsüdang Rajnath-i "linük kati pei atema dang bilembaji tebilemstü tulu ka lir" ta ashi.

"US tiri Paris tenangzüktep atema osang sangdongbaji asenok aser alima atema taoksatsü osang ka liasü. Ajisüaka, US-i iba telemtetba meyipa repringshitsü imlar" ta paisa shisem.

Trump-i Paris tenangzüktep nung parnok madenba osang sangoktsüdang, "India-i iba tenangzüktep nung shilem agibaji foreign aid sen billion sa billon dollars angutsü atema lir" ta ashi.

Yashi External affairs minister Sushma Swaraj-i Trump indang onük magizükba metetdaksü aser lai ashiba agi, "India-i Paris tenangzüktep nung sign asübaji tanga linük kari ashiba ajanga mesüra sen atema masü."

"Onoki alima tzümopung kümzükba ayutsü tangatetba nung sign asü. US maden yonga India-i iba tenangzüktep nung shilem ka asütsü" ta Swaraj-i osangbener dang ashi.



Ranchi kübok Kanke block anasa Sukurhutu yimtsüing nung telok ana tsüingda mangatettep adoka raratepba sülen police-i lendong atalokba tesem mita anükba noksa nung angur. (Ranchi, June 6)



Kabul, June 6 : 2017, June 06-nü Afghanistan yimtiba Kabul nung "Kabul Process" indang noksa ka yangi angur. United States, Russia, China, United Nations, NATO aser European Union densema linük 20 nungi "Kabul Process" senden ya Mongulbarnü Kabul nung tenzükogo.

London Bridge amaker rongnung tenüing tasembuba metetdaksüogo

London, June 06 (Agencies): London yimti tiyongtsü nung nisung tepseta aser yirutsüba mapa inyakba mapang police temi khaseter rongnung tasembuba ya arishi küm 22 tain, Youssef Zaghba, ta jangjaogo. Aser Youssef ya 'dual citizen' (Italy aser Morocco) lir.

Iba lendong agütsür nisung asem rongnung nisung ana tenüing bo British police-i jangjar liasü aser tasembuba tenüing ya mesangdongi liasü.

Zaghba tetsü ya Bologna nungi aser tebu ya Morocco nungi lir, ta osang ka ajanga ashi.

"Iba nisungba jangjashitsü asoshi par tsürabur nem osang agütsüogo aser pa ya arishi küm 22 tain, Youssef Zaghba, east London nungi lir. Pa ya Italy nunger aser Morocco nungi aru. Pa ya police-a masü aser MI5-i tenük yoka aliba nisunga masü," ta Metropolitan Police ajanga ashi.

Iba ken o nung temolung malemba nisung ka itangiter temi Barking nungi Mongulbar anepdang pua lir, ta police ajanga shisem.

London nung kiralongra mapa inyakba nung shilem agir nisung ana tenüing Metropolitan police ajanga Hombarnü metetdaksü. Tena tenüing ya Khuram Butt aser Rachid Redouane lir aser Butt ya bo police temi meteta liasü saka pai iba lendong agütsütsü sentong yangluba ya melazüki liasü.

Butt ya arishi küm 27 tain aser pa ya British citizen saka Pakistan nung aso aser Redouane ya arishi küm 30 tain aser pa ya Morocco aser Libya nunger ta ashir, ta national counter-terrorism police nung tekolakba, Mark Rowley-i sangdong ka nung ashi.

Iba lendong agütsür nisung asemprong ya police temi minute ti tsüingta nung khaset.

Honibar aonung London Bridge anasa item nisungtem ya temang nung bomb taila inoker arua lendong agütsüba ya Britain nung ita asem majung tsüingta kiralongra mapa inyaba tasembuba liasü aser iba lendong ya general election agitsü anogo ka dang lia adalok. Item nisungtem yaki van ka nung mener lenmang nung senzüa aliba nisungtem dak menüing aser nisung kar dak kotari agi atsüing.

"Iba lendong agütsüba indang bushisüingdang ya kanga tekarakba nung inyaker aser kanga tepenja noksatem adongtena otsü bushitettagi. Tang tashi nung ketdangsertemi nisung 12 puogo - tetsür tenet aser tebur pongu - aser kiojen trok nung mita bushiogo (pezü Deobarnü aser ana tanü). Onoki apur rongnung tetsü ka aser tebur ka chiokogo," ta police temi sangdongba nung shia lir.

Kabul nung India Ambassador, Manpreet Vohra'er kidang RPG ka pokloksü

Kabul, June 06 (Agencies): Afghanistan linük nung India embassy indang ki Kabul nung aliba nung rocket-propelled grenade (RPG) ka pokloksü, saka nisung kata yiruba mesüra asüba osang mali, ta External Affairs Ministry osang ka ajanga ashi.

Afghanistan nung Indian Ambassador, Manpreet Vohra'er ki Kabul nung aliba

nung Mongulbar nikongdang iba RPG ya volleyball court nung tsüka apok saka iba bomb ajanga nisung kata meyuru, ta osang ajanga ashi.

Iba lendong adalokba sülen Vohra-ia aitsü aser iba amala lendong ya India nungeri metsübur, ta shisem.

Taoba hopta Afghan yimtiba Kabul nung bomb apokba

ajanga nisung 150 dak tali taküm samar mitkartem tali tesashiba nung yimti anükba mapang iba lendong adalok.

Afghanistan linük nung yimjung alitsü ken o jembitsü asoshi Kabul Process senden ka tanep nungi tenzükogo. Iba senden nung India densema linük 20 nungi züingsem arua shilem agiba mapang lir.

Russia Military Intelligence-i US voting supplier hack asü: Report

Washington, June 06 (Agencies): Hillary Clinton aser Donald Trump tsüingta tatembang buba election magi tsüingta Russia nunger computer 'hack' asürtemi US e-voting yangluba company amak, ta intelligence osang ka temai adoktsüba nung shia lir. Computer hijack asüba malware amshia Russia nunger 'hacker' temi America nung local sorkar ketdangser indang inyakyim metettsü merang, ta National Security Agency (NSA) amanger, ta The Intercept-i sangdongba osang nung shia lir.

Iba osang ajanga ashiba agi, Russian Military Intelligence ajanga tangar puatsüsa email balala ya local election ketdangser 100 dak tali dangi October-November mapang yok.

US intelligence agency temi The Intercept dang tarutsü nung kümzüka alitsü asoshi nüngdakba kuli kar yua alitsü shiogo aser iba ama The Intercept ajanga inyak, kechiyong iba telok ya nüburtem aikatibo memetet.

Saka iba inyakyim ajanga election maparen nung kongshi asü mokongshiar mejangjateti lir, ta iba document nung shia lir.

US intelligence agency ajanga January nung asadangtetba dang nungi iba otsü temai adokba nung

timba lir. "US mesüra local electoral board tem indang inyakyim ya Russia intelligence ajanga ngutet, saka iba system ajanga vote züingdangba nung mokongshi," ta Department of Homeland Security ajanga January nung bushiteta liasü.

The Intercept dang iba document temai adoka osang agütsüba asoshi arishi küm 25 tain, Reality Leigh Winner federal kentdangsertemi puogo, ta Tom Winter-i Twitter nung zülutsü. Iba otsü temai adoker ghonda eshika sülen Winner anema mitkar osang bendena brokshiba aser samatsüba ken o ka benok.

Trump-i election nübuyim nung Russia den yariteba inyak, ta ken o ka benoka FBI ajanga bushisüingdang tenzükba ajanga Opposition teloki Donald Trump aitsüba mapang ka nung iba osang ajanga anu Trump jenjang tamajungba kümdaktsür, ta osang ajanga ashi.

Trump-i aiben Russia tir, Vladimir Putin tenüing sanga arur aser taoba US tir, Barack Obama, taoba Secretary of State, Hillary Clinton aser US indang obendangba inyakyim aija arur.

Trump ya Putin-i amshinütsü amshir, ta Clinton-i taoba küm shia lir.

Herat nung bomb apok, nisung 10 asü



Mongulbarnü Herat nung bomb apokdak tesem nung yirur aliba nisung ka nüburtemi mozü ki-i anir aoba noksa nung angur.

Kabul, June 06 (Agencies): Afghanistan nung aliba Herat province nung bomb ka apokba mapang nisung 10 asü aser aika yiru, ta police ketdangsertemi osangbener dang ashi.

Iba bomb ya rickshaw ka nung inoktsü aser Jama Masjid anasa Mongulbarnü pokdaksü, ta police odongtar, Abdul Ahid Wali Zada-i ashi. Jama Masjid ya Muslim nunger indang tekülem ki tulu ka lir aser iba tekülem ki ya century 12 nung yangluba lir.

"Iba lendong ajanga nisung taküm samaba ya anu alitsü südi," ta Wali Zada-isa shisem.

Iba osang züluba mapang tashi nung lendong agütsüba tenüing agir telok kata maliasü.

Iba lendong ya ozü telokibo magütsü, ta Taliban telok indang odongtar, Zabihullah Mujahid-i osangbener dang ashi.

Iba lendong indang noksatem social media balala nung inokja aliba nung Jama Masjid alema mokozü tanak adoka angur.

Afghanistan yimtiba Kabul nung tawa lendong aika adalokba sülen yimjung ken o jembitsü asoshi Afghan tir, Ashraf Ghabi-i senden ka ayongzüka aliba mapang iba lendong adalok.

Kabul yimti nung aliba foreign embassy tem anasa May 31 nung truck sünga bomb inoker pokdaksüba mapang nisung 150 dak tali pokset.



Kiev, June 6 : 2017, June 6 nü Kiev, Ukraine nung Parliament kima 'Healthcare' ozüing tajungba küma yanglushitsü takhangba aküja nüburtemi longkak aitba mapang nisung kar ali nung mejanger sü agi longbanger aliba noksa nung angur.

Centre-i sensakertem...

(Tapak 1 nungi...)

BJP sorkari "Saab ka saath, saab ka vikas" omen kübok inyaksü. Iba Great Membership Drive kübok BJP-i taruba State General Election matongdang nisung lakh 5 BJP nung züngsem kümdaktsü alizüng lir, ta paisa shisem.

Nisung kati paper form nung mezülui aser registration fee kecha magütsü dang toll free number 1800-266-1001 nung missed call ka agütsüba ajanga BJP züngsem akümtsü akok. Tang Nagaland nung BJP primary members lakh 1.5 shi lir aser iba Great Membership Drive ya June 25, 2017 tashi agütsü, ta Lhoungu-isa ashi.

Iba maparen takok ngua inyaksü atema Centre nungi lennirtem-i state semdangtsü aser külen State lennirtemi district units semdangtsü aser district level lennirtemi den Constituency level semdangtsü, ta paisa shisem.

Tanü agiba Great Membership Drive sentong nung mendenji BJP Kohima District Unit, Dr Khriezovolie Kesiyie liasü.

Modi'er sorkari...

(Tapak 1 nungi...)

India kübok tanüngba tesemtem den jenjang kasa kümdaktsü atema sorkari Northeast dak temulung agüja mapa inyaker" ta Jitendra-i metetdaksü.

Northeast state 8 temi tanü pei pei state nung terenlok lir aser tanga state tem ama tejakleni aoer ta shitetsü, ta Minister of State for the Development of the North Eastern Region (DoNER)-isa shisem.

NDA sorkari Northeast nung temulung agütsüba asenoki meyipa reprangdangra, tesüba küm asem tsüngda Prime Minister-i 10 ben dak tali Northeast semdangogo aser ano pai May 26 nü sorkar küm asem ajungba anogomung Guwahati nung arua amungtsü lemtet, ta Jitendra-isa metetdaksü.

Senotsü lemküba tsütsü reprangra, tesüba küm asem tsüngda Northeast nung shilem 25 agi teimba senotsü lemküko. Gari lenmang yanglutsü atema sen crore 40,000 dak tema lemküja lir. 'Northeast Road Development Scheme' ta ser special road corporation ka tentetogo aser iba telok ajanga northeast nung gari lenmangtem anepalutsü, ta paisa ashi.

Office of the
ASEMTZURI ROGO
Headquarters- Lirmen Village, P.O. Mangkolemba, B.P.O Longchem
Mokokchung : Nagaland

Asem Tzuri Rogo Lirmen nungi züngsem tajung Wb. T. Samuel Ao aser Wt. Purtila na jala **Kr. Imcharenla Longchar**-i 10/10 CGPA class 10th CBSE nung India ajunga nungi subject ajak nung 100 ngua temaba jenjang nung takok ngutetba asoshi tenüng asanger. Talisa Asem Tzuri Rogo aser yimer nem konang nungasang bener arutsüba asoshi tetushi agütsür. Tsüngremi la wadang nung azükarodakjangma.



Sd/-
President, Asem Tzuri Rogo

Sd/-
Secretary, Asem Tzuri Rogo

TEPELA LEMSATEPER

Ngangshijemba zünga Lirmen rongnungi mezümbuba Wb. T. Samuel Ao aser Wt. Purtila na jala **Kr. Imcharenla Longchar**-i 10/10 CGPA class 10th CBSE nung tematiba jenjang (topper all India 2017) nguteta zünger aser talisa yimer nem konang nungasang bener aruba asoshi tetushi agütsür. Tsüngremi maneni la aser tsürapurtem moajangma.



- Ngangshijemba Zünga, Lirmen Village

OFFICE OF THE
DIMAPUR WAROMUNG SENSO TELONGJEM
TENÜNGSANG AGÜTSÜR

Waromung jala ana, **Smt. Tiakala Ao, NPS, D/o Lt. Yimrongtuden Lmtr aser Smti. Tiajungla Ao, NPS, D/o Wp. Merenkaba Lmtr tenati Nagaland Police nung Deputy Commandant** jenjang alangzüteta yim aser lokti nem konang tajung bener arutsüba asoshi Dimapur Waromung Senso Telongjemi tenüngsang agütsür.

Nenok tasütait aser jitpera lenisüba ajanga nübertem kümzüka aser alima tesünep nung yutetsü DWST teimla tulu lir.

Sd/-
(CHUBAKUMBA)
President

Sd/-
(IMLI LKR)
General Secretary

TENÜNGSANG AGÜTSÜR

Ozü Mangmetong Arogo nung jala Rev. **R. SANGYULEMLA IMCHEN** Asso. Pastor (Women) ajanga teindang aser bendanga agütsüba tanela bener ajemalua küm 25 shi tenzüka arur, tenzüka jenjang nungbo temeshitiba/tematiba tenüng (Reverend) ABAM ajanga 20th May, 2017 nü la nem Reverend ordination agütsüba atema la aser lar kibong nem Imchen Kidong Mangmetong "A" Khel ajanga tetushi tulu agütsüba den, iba jenjang tongtetsüsa Tsüngremi la aser lar kibong len aniba atema Tsüngrem tenüng asanger aser Mangmetong Baptist Arogo danga kanga pelar.

Iba temeshi tenüng ngutetba ajanga ozü Arogo nung dang masü saka nungdakba mapang aser tesem ajak nung Kibuba tanelar lu tuluba aser tajetba inyaksü, tzüra-a aser sama-a aliba santem Kibubar kidangi anidenba nung shilem tuluba agitetsü ozü kidong puri imlaa aser yongyaa sarasadema atar.

Sd/-
TEKASASHIIMCHEN
Chairman
Imchen Kidong Mangmetong "A" Khel

Sd/-
ARIPONG IMCHEN
Secretary

NATIONAL SCHOOL OF DRAMA
(An autonomous institution under Ministry of Culture, Govt. of India)

CAMP DIRECTOR, NSD'S TIE WING, AGARTALA, TRIPURA NUNGDAKER

NSD's TI Wing, Agartala, Tripura nung Camp Director ka contractual basis nung shimtsü atema application meshir. Kümsük : Küm ka, iba kümsük kümji nungdakra ano atsülangtsü akok .

Consolidated Remuneration : Rs.75,000/- per month.
Upper Age : 57 years.
Experience : Dramatic Arts mesüra Theater maparen nung mongin asütsüla.

Iba mapa atema prescribed Application Form NSD's official website www.nsd.gov.in nung agüja aliba amshia educational qualifications, Experience, age etc. tejangja zülur Director, National School of Drama, Bahawalpur House, Bhagwan Das Road, New Delhi-110001 ket nung aser e-mail registransd@gmail.com ajanga iba advertisement ya adoker anogo 15 tsüngdasa atongtsüsa yoktsüla.


davp 09130/11/0012/1718

Molungnen O

Onok dang teti meima aliba asür obala **Tsuktishilu** (Akhoya) temang manemi shiranga aliba mapang nungi tenzüker, 2nd June 2017 anogo pa akümüli tempanger Dimapur nungi Tuli tashi oa, 5th June 2017 Senlem maparen ajak tempangba anogo tashi, yimer yimsanger, kiyong kinar, medemsortem, arogo, lokti balala, kija kibongtem aser kinungertem shirnoki ozü mangyim mapang nenok tamang sarasadem, shisatsü, nübu aser rongsen tulu agi onok den khuret lemsatpogo, nenok ajak dang kanga pelar.

Nenok temeim mapa onok mulungjang nung teti alitsü. Tulusang Tsüngremi nenok temeim mapa tajung asoshi moajangma ta onoki sarasademtsür.

- Temeim Kinungtsü, Chirnur aser Kinungertem.

**TEPELA LEMSATEPER**

Wb. T. Yanger (Khar) kibubar tenzüka wadang nung Bhandari Town Ao Baptist Fellowship (1997-June till date) nung Pastor mapa inyaker tanü küm metsü ajunger. Iba anogo nung onoki Tsüngrem tenüng sanga maneni pa taküm tali temaba jenjang nung Khristar wadang asoshi moajangma ta sarasademtsür.

- Temeim Kinungtsü, Tanur aser Kinunger.



OFFICE OF THE
CHUNGTIA SENSOTSÜR TELONGJEM
B.P.O. SABANGYA, CHUNGTIA
P.O. MOKOKCHUNG -798601 NAGALAND
SANGDONGER

Dated 2nd June 2017 anepdang Chuchuyimpang nunger Wb. Sujungkaba-er jabaso Wb.Lolenwati-i Chungtia sensotsür Wt.Moarenla Imchen D/o Wb.Tekakumba Imchen tashiyim agi merenshia tepsetba Chungtia sensotsür Telongjemi KhuKhua aitsür.

Iba ama meimchir dak maketba shiruru shisatsü aser taochi makaba jakla tamajung nisung tepsetba tashi pie teka nung amer taküm ka tempangdaksüba yabo tai madoktsü, Aser sorkari tetepseter ajak pua tapet temerenshi magütsü tashi pei temeten Chungtia sensotsüri longjemer Chungtia Yimden yaria nokdaksü.

Chungtia sensotsüri asür kibong den mangyim jashi lemsateper aser iba tongpang raratsü asoshi onok ner den lir ta ayimoktsür.

Sd/-
Toshilemla,
President.

Sd/-
Sentillila,
Secretary.

WANTED

Kitchen Helper | **Salary - Rs. 5000/-**
Guest House in | **Fooding & Lodging**
Shillong | **Free**
Ao Female - Above 20 | **Contact : 9436439721**
years | **7005017981**

GOVERNMENT OF NAGALAND
TRANSPORT DEPARTMENT
NO.TPT/SPL-POOL/2/20 17 - Dated Kohima, the 5th June, 20 17
SHOW CAUSE NOTICE

Whereas Shri. Lhiwetsolo Kapfo, Driver Grade-I under Transport Special Pool, Transport Department has been found absent from Government bonafide duty since 2015 without availing any leave or permission from the competent authority.

Now therefore, Shri Lhiwetsolo Kapfo is hereby directed to report to the Transport Special Pool within 30 (Thirty) days time from the publication of this Notice failing which the service of Shri. Lhiwetsolo Kapfo, Driver Gr-I, Transport Special Pool shall be liable to be terminated.

Sd/-
C. NEIHU THUR, IAS
Commissioner & Secretary to the Govt. of Nagaland

Issued by: DIPR

Manipur-i Senior Women's Football Nationals 18 ben buba kokogo



Takok marok agizüker külemi tangokba yangi noksa nung angur.

Jalandhar, June 06 (Agencies): Hombarnü Punjab, Jalandhar nung senior women's National Football Championship final asaya nung Manipur-i otsü tasen ka yanglua Railway kokogo. Parnok tang agi iba asayamong 18ben buba akoker.

Iba asaya nung Manipur tsürtem atema Ng Bala-i goal ana aser Dangmei Grace-i goal ka agüja 22buba State Senior Women's National Football Championship 3-1 agi Railways Sports Promotion Board madak takok angu.

Ng Bala-i Odisha den semifinal asayaba mapang goal idaktsüba yimya mesamai

maneni final asaya nunga goal agüja liasü. Lai Odisha den asayadanga asaya tanabuba shilem tetenzüklen goal agüja tenzük. Ajisüaka Hombarnü final asaya nungbo lai asaya tenzükler minute 21 buba nung goal agütsü. Asaya tanabuba shilem nung minute 6 shi or Railway telok nungi Kabita-i goal ka agüja score 1-1 ta aküm saka Manipur tsürtem parnok asoshi kanga dang tashi tait liasü. Railway telok nunga Manipur tsürtem 6 lir aser parnok asembo iba asaya nung shilem agia liasü.

Asaya nung maneni Railway puri goal agütsüba

sülen minute 2 dang lir Dangmei Grace-i Manipur pur atema goal tanabuba agütsü aser iba sülen minute 81 buba nung Ng Bala la asoshi tanabuba aser par telok asoshi tasembuba ta goal ka agüja parnok iba asayamong akok.

Iba asayamong ya 1991-92 nung mezüngbuba Imphal nung asayaa tenzük aser tang tashi nung 2013-14 Bhilai (Chhatisgarh) nung asayadanga Manipur tsürtem final metongteti lir.

Senior Women's National Football Championships asayaba nung Manipur tsürtem pezüben dang tamakok ngua lir.

French Open 2017: Bopanna-Dabrowski Semi-Final tongogo

Paris, June 06 (Agencies): India nunger tennis asayar Rohan Bopanna aser Canada tsür Gabriela Dabrowski-na 2017 French Open

temeyoktep tarep asaya Semi-final tongtetogo. Tenati Quarte-final nung India tsür Sania Mirza aser Croatia nunger Ivan Dodig-na madak minute 52

nung 6-3, 6-4 agi akok. Iba asayamong nung India nunger tennis asayar rongnungi Bopanna ya dang anünga lir.

OFFICE OF THE AO STUDENTS CONFERENCE (AKM)

MOKOKCHUNG; NAGALAND

PELABA LEMSATEPER:

Ao Kaketshir Mungdang (AKM) aküm kübok Tzürangkong nung 27 buba Naga Students Federation (NSF) lokti inti mungdang meraketa agiteta tembangtetba ya asen AKM Planning Committee aser Local Planning Committee-i anir luden tentet balala-i tzu meseni nungita mapa ajak nung amalitepa inyaktetba ajanga takok ngutetogo. Iba den repsema kija, kibong aser lokti tentet balala shirnoki nungdakba ajak nung nübu den rongsen aser sarasadem agi nungita nokdakogo AKM-i nenok mapa tajung kodanga mamatsü.

Maneni Tzürangkong senso tajungtemi iba mungdang tulu takok ngutettsüsa lenmang ajak nung yaritepba atema AKM-i pelar.

Nenok ajak Tsüngremi mojangma.

Sd/-
Imkongwati Lkr
President
AKM

Sd/-
Lolentoshi Jamir
Asst. General Secretary
AKM

FPAI puri ISL Team tem nung bendanglen nungi asayartem tajemba asayadaktsüner



Kolkata, June 6 (Agencies): Bodhbarnü Asian Football Confederation (AFC) headquarters, Kuala Lumpur nung stakeholder tem ajak senden ka akaba mapang, tanga onüktem den külemi tongtibangsa ISL nung bendanglen nungi asayartem tang 6 asayaa aliba ya tajemba kümdaktsütsü asoshi asüngdangtsü atema Football Players Association of India (FPAI) sentong lir.

Hombarnü senior football asayartem den senden ka akaba mapang taoba All India Football Federation (AIFF) tir aser advisor Bhaichung Bhutia aser Renedy Singh nati tebilemtsü balala aser FPAI tamendakdak lemsatepba, general manager Cyrus Confectioner-i osangbenertem nem metetdaktsü.

"Tebilemtsü tulutibaji asayartem mapa manguba ya lir. Onoki I-League aser Indian Super League na ka küma longjemer mesüra külemi inyakkaktsüner. ISL nung playing eleven nung India nunger football asayar timba anioka asayadaktsütsüba ken o, Kuala Lumpur nung senden akaba mapang benoka jembitsü asoshi sentong lir," ta Confectioner-i ashi.

"Onoki FSDL (Football Sports Development Ltd) dangi iba onük benoka zülüogo saka tang tashi kecha telangzüba

mali. Kodaser ISL nung India nunger asayar 40-i Indian football yaritsü? ISL nung team aser India nunger asayar timba nungdaker," ta pai shisem.

Mongolbarnü Bhutia aser Renedy na iba senden nung adentsü, ta Confectioner-i ashi.

Taoba India captain Bhutia-i Deobarnü osangbenertem dang ashiba agi, "ISL aser I-League na longjemtsüla aser Indian football ajangzüksü asoshi team 20 asayamong ka mapang talangka agia parnok o parnok na tsüngda asayatsüla. Tangbo league ka ita pezü shi asayar aser iba sülen ita pezü ponguka lir tanabuba league asaya tenzükler. Iba ajanga football asayartem majangzükler."

"Asayamong anprongla külemi mapang ka nung asayara asayar timba asayamong tulu nung asayatsü asoshi maongka angutsü. Iba ajanga India nunger football asayartem asayatsü maongka mongoi aliba tebilemtsü agintsü aser parnok nem tajangzük agütsütsü, kechiyong asayar ka atema küm anioka asayadaktsütsüba ken o, 15 shi dang asayateter koba mapang kanga tatsüka dang lir," ta paisa shisem.

Hombarnü senden nung tangarden külemi ano Mohan Raj, Mehtab Hossain, Arindam Bhattacharya, Alvito D'Cunha, Naseem Akhtar aser Anit Kumar Ghosh nunger densema liasü.

YIMTSÜNG NUNG ALIBA LANURTEM NEM
ENTREPRENEUR AKÜMTSÜ TASHI AGÜTSÜBA

Rural Self Employment Training Institute (RSETIs) tajungba nem sempet agütsür

4th
**RSETI
DIWAS**

Powering
Rural Entrepreneurship
2017

7th June 2017
Vigyan Bhawan, New Delhi

Narendra Singh Tomar
Union Minister for Rural Development,
Panchayati Raj, Drinking Water and Sanitation
Will grace the occasion as Chief Guest

Ram Kripal Yadav
Minister of State for Rural Development
Will Preside over the function

Santosh Kumar Gangwar
Minister of State for Finance
Will be the Guest of Honour

Dr. D. Veerendra Hegde
Co-Chairman, National Level Advisory
Committee on RSETIs
Will be the Guest of Honour

Yimtsung renloktsü asoshi lanur dak tashi aliba lenmang sayuba

- Pei sasa mapa inyaktettsü atema shishilembaba den apet Skill Development
- Bank tem ajanga sen aputsütsü tejangja - Mudra & Stand-up India

22,87,020
Rural Youth
Trained

13,43,567
Rural Youth Self
Employed

5,93,734
Availed
Credit
Linkage

587
RSETIs
across the
country

BILEM DANGANG "yimya sübaba nem na tanishidaktsü".